

TEILO (ELIUD, weithiau), sant Celtig o'r 6ed ganrif

Enw: Teilo
Rhyw: Gwryw
Galwedigaeth: sant Celtig
Maes gweithgaredd: Crefydd
Awdur: Emrys George Bowen

Yr oedd ei barch ('cult') yn anarferol bwysig yn Ne Cymru ac yn Llydaw. Fel yn hanes llawer o'r seintiau Celtig eraill y mae gwir hanes ei yrfa a'i weithredoedd wedi ei gollu ers llawer iawn o amser. Yr hyn sydd gennym ydyw ymdrechion awduron yn y Canol Oesoedd i weu ystori o'r traddodiadau a'r hanesion a oedd wedi eu cadw hyd hynny - a'r cwbl wedi eu haildrefnu yn ofalus yn ffafr golygiadau crefyddol a gwleidyddol arbennig yr ysgrifenywyr. O Lyfr Efyngylau S. Chad (yn Lichfield y mae'r llawysgrif yn awr eithr bu ar un adeg yn Llandaf; copi ffacsimile yn Ll.G.C.) y daw inni'r dystiolaeth gynharaf am barch S. Teilo. Er na ddywedir dim yn y llawysgrif am Deilo 'n bersonol y mae nodiadau ar ymylon rhai dalennau yn profi ei fod yn cael ei fawrygu a'i barchu yn Ne Cymru yn y 9fed ganrif, dair canrif wedi iddo farw, fel sylfaenydd mynachlog - mynachlog Llandeilo Fawr yn Sir Gaerfyrddin, y mae'n weddol sicr. Tua thair canrif yn ddiweddarach ceir buchedd faith a llafurfawr o'r sant yn ' Llyfr Llandaf ' - y fuchedd hon wedi ei hysgrifennu gan un a geisai fawrhau hawliau esgobaeth Llandaf a oedd newydd gael ei haddrefnu gan y Normaniaid. Y mae fersiwn arall o'r fuchedd yn B.M. MS. Vespasian A. xiv; y mae'r fuchedd honno yn cytuno â'r un sydd yn ' Llyfr Llandaf ' oddieithr bod rhai pethau pwysig wedi eu gadael allan. Dangosodd y canon G. H. Doble yn 1942 ei bod yn weddol sicr mai y fersiwn yn Vespasian A. xiv yw gwreiddiol honno a geir, eithr wedi ychwanegu ati, yn ' Llyfr Llandâf.' Y mae'n amlwg oddi wrth ' Llyfr Llandâf ' fod y traddodiad am fynachlog Llandeilo Fawr ac am ran helaethaf meddiannau honno wedi ei drosglwyddo'n fwiadol a'i gysylltu ag eglwys gadeiriol Llandaf. Yr hanes a roddir yn y cyfnod diweddar hwn oedd i Deilo gael ei eni gerllaw Penalun (' Penally ') yn nehau Sir Benfro, iddo ddyfod yn ddisgybl i **Sant Dyfrig**, ac iddo wedi hynny astudio gyda **Peulin** yn Llanddeusant yng ngogledd Sir Gaerfyrddin a dyfod i gysylltiad â **Dewi Sant** yno. Dywedir (yn ' Llyfr Llandâf ' eto) i Deilo, **Dewi**, a **Phadarn** ddu ymweliad â Jerusalem. Wedi iddynt ddychwelyd gorfu i Deilo, ynghyd â llawer o'i ddilynwyr, ffoi o Gymru oblegid y pla melyn ac aeth trwy Gernyw i Lydaw lle yr arhosodd am gyfnod o saith mlynedd a saith mis. Wedi iddo gyflawni llawer o 'gampau' dychwelodd i Gymru a marw, y mae'n debygol, yn ei fynachlog 'ar lannau Tywi.'

Y mae'r dystiolaeth fwyaf gwerthfawr sydd gennym heddiw am hanes Teilo i'w chael yn nosbarthiad yr eglwysi, y capelau, a'r ffynhonnau sanctaidd sydd yn dwyn ei enw. Y mae y rhain yn hynod o niferus yn ne-orllewin Cymru - dengys hyn yn bur bendant fod cysylltiad rhyngddo a Llandeilo Fawr. Ymddengys hefyd iddo gynorthwyo (gyda **Dewi Sant** efallai - y mae peth tystiolaeth i hyn mewn cyflwyniadau eglwysol) mewn rhyw adfywiad nerthol yng Nghristnogaeth Geltaidd, a ddaeth o orllewin Cymru ac a ddug ddylanwad Teilo a **Dewi** i sir Frycheiniog, sir Faesyfed, ac, yn arbennig, i sir Fynwy a chyffiniau sir Henffordd - darn o wlad y buasai saint cynharach megis **Dyfrig**, **Cadog**, ac **Illtud** yn llafurio ynddi. Y mae'n bosibl, hefyd, i Deilo, megis y gwnaethai **Peulin** ei feistr, lafurio yn Llydaw neu ynteu i sefydliadau yn deillio o'i fynachlogydd ef yng Nghymru gael eu codi, gyda chymorth llu o fyneich a ymfudodd, ac i'r rheini ddwyn ei 'cult' ef i'r wlad honno mewn cyfnod diweddarach a rhoddi i'r lleoedd newydd dros y môr enwau y lleoedd y daethent ohonynt. Fel hyn, efallai, y gellir esbonio y dystiolaeth a roddir gan enwau lleoedd y dyddiau hyn, yn enwedig yn Cornouaille, i gryfder parch Teilo ar un adeg yn y manau hynny.

Awdur

Yr Athro Emrys George Bowen, (1900 - 1983)

Ffynonellau

Baring-Gould a John Fisher, *The Lives of the British Saints: the saints of Wales and Cornwall and such Irish saints as have dedications in Britain*iv, 226-42

G. H. Doble, *Saint Teilo* (Llanbedd 1942) ('Welsh Saints Series,' No. 3) (Lampeter, 1942)

E. G. Bowen, 'The Settlements of the Celtic Saints in South Wales,' yn *Antiquity*, 1945, 175-86

Darllen Pellach

Erthygl Wicipedia: Teilo

Dolenni Ychwanegol

VIAF: 221170947

Wikidata: Q680538

Dyddiad cyhoeddi: 1953

Hawlfraint Erthygl: <http://rightsstatements.org/page/InC-RUU/1.0/>

PDF Argraffu Cyfeirnod

Mae'r Bywgraffiadur Cymreig yn cael ei ddarparu gan Lyfrgell Genedlaethol Cymru a Chanolfan Uwchefrydiau Cymreig a Cheltaidd Prifysgol Cymru. Mae ar gael am ddim ac nid yw'n derbyn cymorth grant. Byddai cyfraniad ariannol yn ein helpu i gynnal a gwella'r wefan er mwyn i ni fedru parhau i gydnabod Cymry sydd wedi gwneud cyfraniad nodedig i fywyd yng Nghymru a thu hwnt.

Ewch i'n tudalen codi arian am ragor o wybodaeth.

frannu

Arddull APA

x

Preifatrwydd a Chwciis
Hawffraint
Y Prosiect
Cymorth
Cysylltu

LGC
NLW

LLYFRGEL
THE NATION



Yn ddiwedd
Llywodraeth Cymru
Supported by
Welsh Government